

四庫全書

史部

欽定四庫全書

史部

宋名臣奏議卷九十七至一百

詳校官侍講臣王燕緒

編修臣裴謙覆勘

總校官進士臣繆琪

校對官中書臣范鏊

謄錄舉人臣呂日永

欽定四庫全書

宋名臣奏議卷九十七

宋 趙汝愚 編

刑賞門

賞罰

上仁宗論近年賞典太優刑章稍縱

龐 籍

臣聞國家之重先乎紀綱紀綱之要實在賞刑賞不失

有功則勞臣勸刑不失有罪則姦人懼二者或失紀綱
必隳伏惟皇帝陛下英睿恭勤綜覈羣品博詢下議以
裨闕政況臣蒙荷天造粉身無報敢罄愚管少陳時事
伏覩近年賞典太優刑章稍縱夫官爵之設所以磨礪
羣器以成萬務苟無勞而賞則人不務施勞無德而祿
則人不務修德近因上殿奏事之際因言及此親聞德
音亦以僥倖為患此聖心固已知矣以陛下欽明之德
而尚有僥倖之澤臣恐由執事者有失持守典章之故

也夫戚里之族親近之臣得至帝座之前皆有求恩之意各徇其請則爵祿之數有限僥倖之求無極然人君以寬仁為德其哀鳴於前者恐難峻阻則必勉徇其意降旨於外臣愚欲望陛下明諭大臣執守規矩無致超越大臣既執之陛下已從之求恩者至於再至於三則僥倖自息綱紀常存留此超等之恩以待有功之賞又觀近年刑典太寬漸啓姦路且殺人者死古今通制自朝廷降敕死罪情理可憫者並令奏取敕裁免或有不

申明言更不駁勘自此殺人者得設計謀造作情理一行上讞無不容貸者其法不過杖脊配軍獲生者雖荷寬恩被殺者幽寬何訴所以天下殺人之獄歲益多矣實恐自此豪強之民有殺人命者行賂造情以求奏貸無復償其死命此蓋欲為寬法以感召和氣臣實以謂不然至於盜賊之黨在制其萌兆小盜不捨則大寇不集前代本因小寇失制遂成嘯聚為天下患者多矣近貴州刼賊何安等六人各執槍杖自稱將軍本處知州

譚綜妄作情理奏聞貸却五人遠方之民被此強劫今
貸活之臣恐自此盜賊不懼若遇荒歲羣黨必成結聚
既多必須加兵峻法以誅之臣謂誅其衆於後曷若戒
其事於前欲望今後諸處奏到殺人強劫罪人如其情
理無可憫之狀即乞依法處正不與容貸臣出於儒生
非樂聞深典實恐沉寃無訴樊門公啟兼恐法不勝姦
寇盜益熾故宜早絕其萌無使至於難制也所謂熒熒
不已炎炎奈何涓涓不已將成江河此之謂也又貪婪

之吏惟財是圖常使懷於懼心則不敢侵剝於下先帝
深疾贓汚如法嚴戒一經黜削不復齒用近年貪吏益
衆盖由寬法所致向來以贓廢棄者既獲甄叙又降敕
不許按察之官召人告首自此貪心益固自謂得時按
部之官轉難發舉前歲太常博士王昌符知循州為政
貪濫遠近所悉朝廷令放離任皆謂必獲罪譴到闕轉
屯田員外郎又職方員外郎沈厚載知南劍州在任貪
濁不公祇為勘官非才致其漏網然其曲情枉法事迹

灼然洎移知歸州亦轉正郎此所以為過者不惟無懼
罪之心兼亦有望恩之意伏乞遵先朝嚴制改近年寬
典用威賊猾以安黎民又覩軍戎之政稍失防制兵士
漸恣不懼都將都將畏罪姑息其下盖由近歲寬階級
之法啟輕慢之心故也夫軍容不入國國容不入軍此
明治兵之政與常法異也若都將有誅剝其下虐用其
人灼然可罪固不可寬之也若小小曲直亦不須一一
量較輕重况都將本出於卒伍豈無小過失若令兵衆

持而制之則更無畏憚既不畏都將又安得不恣橫為
非若必須無瑕方可臨衆則舉天下能有幾人故在制
置其宜無使兵衆輕制都將都將反畏其下也每有兵
士論訴都將公案內有小小之過皆亦下獄勘罪結案
取裁此亦望朝廷別為經制漸使都將有權則兵不敢
驕縱近戎州奏寧遠指揮兵士馮順等一十八人共謀
結連逃背往賴令寨先斬却寨將勾鑒後撥出本寨衣
甲器械虜掠守把兵士遞鋪軍人往資榮州界打劫收

拾人馬回來搓破戎州占坐候兵馬到却走入蠻界魚買猪於神廟飲血酒為誓因徒中告首幸而敗獲不然則為一方大患矣此乃不畏都將所致也望朝廷深切戒之速宜改立治軍之法

景祐四年上時為侍御史知雜事

上仁宗論江淮官吏迎賊納城不可寬貸

歐陽修

臣聞江淮官吏等各為王倫事奏按已到多時而尚未聞斷遣仍聞議者猶欲寬貸臣聞昨來江淮官吏或飲

物獻送或望賊奔迎或獻兵甲或同飲宴臣謂倫一叛卒放肆猖狂而官吏敢如此者蓋知賊可畏而朝廷不足畏也今若更行寬貸則紀綱隳壞盜賊縱橫天下大亂從此始矣何以知之昨王倫事起江淮官吏未行遣之間京西官吏又以棄城而走望賊而迎若江淮官吏不重行遣則京西官吏亦須輕恕京西官吏見江淮官吏已如此則天下諸路亦指此兩路為法在處官吏皆迎賊棄城獻兵納物矣則天下何由不大亂也臣伏思

祖宗艱難創造基圖陛下憂勤嗣守先業而一旦四夷
外叛盜賊內攻其致害之由者誰哉皆由前後迂繆之臣
因循寬弛使朝威不振綱紀遂隳今已壞之至此而猶
不革前非以寬濟寬何以救弊如晁仲約等情法至重
俱合深行議者無由曲解或聞以謂自是朝廷素不為
備不可全罪外官假如有殺父與兄者豈可只言自是
朝廷素無教化而不罪殺親之人又如有人掠奪生人
男女金帛豈可只言自是朝廷素無禮遜而不罪劫人

之賊迂儒不可用可笑如此李熙古豈獨是朝廷素有
備之州傳永吉豈獨是朝廷素練之兵盖用命則破賊
矣今朝廷素無備禦為大臣者又不責之守州縣者合
有罪又寬之天下之事何人任責切緣韓綱是大臣之
家父子兄弟並在朝廷權要之臣皆是相識多方營救
故先於江淮官吏寬之只要韓綱行遣不重今大臣不
思國體但植私恩惟陛下以天下安危為計出於聖斷
以勵羣下則庶幾國威自振賞罰有倫其晁仲約等乞

重行朝典不可寬恕

慶歷三年十一月上時知諫院

上仁宗論駕馭諸將賞罰當謹

范仲淹

臣竊見許懷德在延州為不進兵擊賊及軍民虛驚拋棄隨軍糧草遂送永興勘劾赦釋放授秦州部管近又西賊侵邊破蕩却熟戶一千帳不能保護即合重行朝典以其在邊無效降充永興部管郭承祐降知相州為轉運使紀充北京都部管此二人一面責降一面遷轉

天下聞之是朝廷賞罰顛倒取笑四方何以激勸勲臣
何以鑒戒墮將如王信狄青實有勇武堪任管軍亦恐
未有大功遷轉太速祖宗朝廷用邊將賞賜甚厚使用
度充足委信至重使生殺在已惟惜官職不令滿志恐
有懈情不思立功實前王馭將之術也又朝廷曾降詔
所闕都虞候等更不循轉候有邊功除授今却不因功
勞衝改此詔而今而後國家之命全無信矣惟用兵命
將之令尤要取信繫之安危與其他號令不同如須合

轉起亦候過郊禮使作該恩方可進爵願陛下再三思
之仍乞丁寧指揮兩府今後議論賞罰不可輕易須是
有所激勸不招旁議方可施行臣謂國家承五代之弊
賴祖宗威德陛下仁聖保守四海久無禍難今四夷已
動百姓已困倉庫已虛兵旅已驕國家安危實未可保
惟賞罰之柄駕馭天下如賞罰頻失何以保太平之業
臣竊懼之願陛下裁擇

慶曆三年上時
為參知政事

上仁宗論張子奭宣勞少而恩賜多

歐陽修

臣風聞知汝州范祥為相度陝西青白鹽敕差張子奭
權知汝州子奭自選人二年內遷至員外郎朝廷之意
雖曰賞勞而天下物議皆云僥倖盖以子奭宣勞止兩
次而遷官恩賜已數重自古賞功不過一次賞之不已
故難弭人言初自選人改京官曰賞勞未及二歲改秘書
丞又曰賞勞賜以章服又曰賞勞秘書丞不久又轉官又
曰賞勞合得太常博士超遷員外郎又曰賞勞後行祠部

為名曹又曰賞勞作京官合作知縣而作簽判又曰賞勞一任未滿合更有一任知縣又超通判差遣又曰賞勞此所以外人之議不允也况范祥暫出幹當只合交割以次官員或轉運司自差人權今朝廷差人已失體又於子與為此僥倖今朝臣待闕在京者甚衆豈無一人堪權知州者朝廷每用一人必當使天下人服今每一差遣則物議沸騰累日不息昔五代桑維翰為晉相一夕除節度使十五人為將而人皆服其精今中書

差一權知州而不能免人譏議者蓋事無大小當與不當而已其張子奭伏乞追寢權差之命仍乞今後外處差出知州只以本路轉運使差官權至於賞罰之柄貴在至公今莫大罪不過一刑而止豈有勞者終身行賞而不已亦今後有勞效之人量其大小一賞而止若有別著能效則拔擢自可不次人亦自然無言伏以朝廷用人惟患守例而不能不次選任但不涉於僥倖實有材藝之人誰敢有言子奭作使西鄙不為無勞但恩賜

已優於賞已足可惜令天下指為僥倖之人而掩其前

效况又上虧朝政不可不思

慶歷四年二月
上時知諫院

上哲宗乞追錢勰誤賞之官 劉安世

臣伏見御史臺舉劾開封官吏將大辟罪人寄廂妄奏
獄空致朝廷誤推賞典如聞已降指揮錢勰止令贖銅
出知越州林邵范子諒並與小郡其餘官吏特免改正
雖門下省嘗具封還續准朝旨惟展磨勘此乃陛下至
仁至厚不欲窮治而勰等所犯情實欺君考之公論皆

謂責之太薄而名且不正事關國家須至論列臣聞人主所以鼓動天下制馭臣民之柄莫大於賞罰使賞必及於有功罰必加於有罪則四海之內竦然向心而無不心服者矣惟其無功者虛受有罪者幸免遂容僭濫而其弊將至於無所勸懲然則為天下者安可不以至公而謹用之乎今開封官吏以大罪之囚權令寄廂敢肆誕謾謂無一人在獄朝廷信用其奏亟推厚賞進官錫服幾二十人下至胥吏亦霑恩賜播傳天下書之史

冊何可掩也繼而臺臣抗章彈其繆戾陛下付之執政
按見實迹縱不欲論以全罪猶當奪其厚賞之官少為
天下誣罔之戒而乃一切仍舊復畀名藩使勲善去不
過如此今賞有罪何以示懲陛下若明正刑典則虛偽
之迹固在勲等苟謂已行之命憚於追改則好名之謗
遂歸朝廷傳之後世實累聖德伏望陛下特徇公議追
勲誤賞之官黜之小郡其餘官吏亦令改正使天下知
公朝之名器不可幸以得非惟塞小人奔競之路亦助

成陛下無私之政所以詳論之者蓋欲救正國家之大體非特區區為一錢齷而發也伏惟留神省察早降指

揮

元祐三年上
時為右正言

上哲宗奏為种誼生擒果莊賞未稱功

常安民

臣聞邊功有二王者之德如天之覆如地之載微至昆虫草木遠而戎夷蠻貊皆被其澤無彼疆此界之異而因利乘便入其土地俘其人民奪其城壘此求利之功也

雖不賞可也賞之不可厚厚則生邊患若夫背德負義
玩威入寇焚毀民居殺掠生聚強據州郡脅誘部族結
從連衡窺伺中華一旦竊發噬臍何及而能先敵鼓勇
出其不意使敵不及拒計不及施此去害之功也安可
不賞賞之不可薄薄則沮士氣往歲西蕃棟戩大將果
莊青伊結梁黠有智數熙寧中於踏白城誘陷洮西安
撫四方館使景思立全軍漆其頭顱為飲酒器人怨神
怒先帝嘗下募賞之令厚捐金帛命李憲圖之凡十餘

年未有能稱詔旨者元祐中乃敢陰連西夏誘結蕃首約為內應從之者十已八分遂犯疆土殺虜蕃戶燒蕩其廬舍掘發其窖藏蹂踐其苗稼斬伐其材木遂據洮州屠戮酋豪無敢誰何方是時种誼守岷州果莊之兵已逼岷乎如掛虎口誼稟命於經畧司求出師者數矣而劉舜卿以朝廷方休兵息民恬不為意其後朝廷遣游師雄使熙河而趙醇忠郎結戩包順包誠之徒灑淚泣訴推心痛恨師雄乃趣舜卿然且猶豫累日卒用誼

謀誼師既出先命焚飛橋以斷蕃兵之路把衝隘以絕
傳報之音卒能雍容靜密生擒果莊獻之闕下西夏五
十萬之衆及境聞之遂皆遁去勲烈煌煌誰與倫比而
廟堂之議乃欲不崇邊功為安靜之策不問其有去害
奇功非求利之比槩薄其賞臣愚竊謂擒獲果莊誼吞
謀首親冒鋒鏑功居第一師雄不辱君命能趣舜卿俾
用誼謀功又次之舜卿觀望勉從功宜居下而當時推
賞師雄自宣德郎軍器監丞改奉議郎陝西轉運判官

繼除校理固不為過舜卿自龍神衛四廂都指揮使高州刺史遂擢為殿前都虞候寧州團練使其崇峻如此而种誼乃自住宅使止遷西上閣門使康州刺史未足以稱其勲烈先帝詔令具在殺獲果莊者未仕人授諸司使今朝廷正宜信賞而酬誼止此豈先帝詔令可以閤乎抑賞可以不行乎以為邊功不足崇尚乎則何以奏告裕陵果莊擒獻之日百官聚見四方馳表稱賀也臣聞鄂特凌古因溫錫沁以附西夏有吞併熙河之志

蕃部一搖足則熙河非中國所有蜀道亦有受敵之憂
矣人材之乏未有甚於今日而將帥之有威名者惟种
氏為最著臣愚竊謂宜於此時申白种誼前日之功優
加褒進以勵將帥則人皆知勸而邊境無虞矣

紹聖三年上時

為監察
御史

上徽宗論任職治事不當一一論功取賞

吳執中

臣竊惟朝廷張官置吏必各因其才足以當其事然後

付以是職於事為治而於職為稱則適足以受是祿居是位而已否則在所當黜也今任其職治其事者不復以為當然必皆一一論功取賞於朝廷臣竊以為過矣開封府大理寺將作監權貨務其尤甚者也臣謹論之開封府之治事大理寺之決獄將作監之營繕權貨務之算鈔此其職也居其務者必出於選用養之以豐祿厚俸以俟進擢固已度越流輩乃以其職事所當為者較計積累以為功勞一歲之內率常五六遷自宣義宣

德郎不二三年而為朝議中散大夫者往往皆是人皆指目謂僥倖誠不可以久行宜有改也臣竊謂朝廷振革頽弊建立法度之初人易以勸而皆趨事赴功固當不吝爵賞以風動天下今法令備具上下維持互相糾正不容其有稽慢縱弛雖碌碌常才足以營職辦事固非有異效可以稱道謂宜參酌裁為定制須其任滿考校功實量加遷陟亦足以示勸庶合中道伏望聖慈更須詳酌施行

大觀二年上時
為御史中丞

上徽宗論西師賞功之濫

許翰

臣承中書省兵房送到詞頭一道為武節郎董成部一百五十四人折亡外亡失二人轉一官減三年磨勘武經郎郭寧部二百七十二人折亡外亡失二人轉兩官事臣聞兵家之法使貪者為我爭愚者為我死夫若是者非他有利以導之也則賞固不可以不厚雖然爵祿顯設於朝惟其得之難也是以人危身而取之使其欲而易得得而易克則人孰復肯輕身冒矢石陷堅拔敵

為國行此危事而求奇功哉故無功而賞則有功者怠
效薄而賞厚則人無志於極功而國不收其偉績是賞
亦不可以不審也昔景德間契丹犯澶淵真宗皇帝親
駕征之自是強敵請盟至今不復窺邊然而師還賞功
如大帥李繼隆等不過進階次加食邑雖周文質身督
所部射達蘭而殪之首帥既亡敵衆遂潰然亦不過小
遷其秩而已又熙寧用兵安南郭達為帥大破賊兵於
富良江自是交趾不敢復動神宗皇帝猶以師無大功

斤其賞當是時燕達最有功不過進秩二等蓋故時邊
賞若斯之艱者將復有以用之故也比者西師賴陛下
神明威武羌戎震懾屈膝請服然其桀黠反覆尚未可
以保其往前將吏之賞不可不留其未滿之意以待復
用也臣自蒙恩使得待罪掖垣與兵房事月餘之間伏
見西師賞功凡行一百七十餘人積除二百五十餘官
其間轉行遙郡者凡二十餘減磨勘者不獲數計距臣
領事之前則所賞不知其幾何也雖臣之愚不足以議

戎事之大計然願陛下參諸景德熙寧審實之意稍求所以酌損故臣輒因董成郭寧之事而推言之非特為此二人惜數官而已也謹按周公六功之賞戰功曰多所謂多者非特貴夫多筭古者振旅則飲至於廟以數軍實計所獲多以為勝焉今二人之兵以其所獲除其所亡猶不足也則是得不酬失功不補過而亦蒙厚賞於朝臣欲遂行其詞則不知所以為說是以冒昧而請之宣和元年上時為中書舍人

宋名臣奏議卷九十七

欽定四庫全書

宋名臣奏議卷九十八

宋 趙汝愚 編

刑賞門

法令

上仁宗論編敕當任達識大儒

宋 庠

臣伏以國朝以來詔數下而建條比牒連名充曹創府

煩科碎目與日而增每罰一辜斷一事有司引用皆連篇累牘不能徧舉率不紀歲則別加論次謂之編敕條貫飭盡綱目畢張大可含元細不容髮王者之制揭若日月動如雷霆其言易而文其禁切而廣伏見今日編敕者繁長猥俗與府縣文符無異用字乖舛遣辭重複寧所謂明白溫醇之旨邪實由不專任達識大儒而多用執法之吏夫法吏者奉行其法可也寧制法之人哉古人有言治國如治家耕當問奴織當問婢今欲與法

吏謀致治之本是猶使奴織而婢耕要其成功不可得也臣欲乞專委鴻博之老及輔弼大臣商較敕條畧依律文為體裁制其文布四海使識朝廷之尊傳萬世俾知文雅之盛仍自今日以往有臣庶上言欲釐改舊章建設條禁者願陛下謹其俞旨必先付之兩府參之羣吏若前條確見其短今文率以為便可行於經久者即再下兩制令以所陳之狀去其蕪雜取其精意倣約律令著為章程若事止苛文不足發明利害者皆寢而勿

報如此則法不數變而民知所從言者必難臣曰今若依律令以為敕天下官吏必不能曉臣對曰今天下所頒律令曹局小吏猶能用之而依律為敕獨不能曉此膠柱之論也又必難臣曰夫詔敕者多先帝所定而不當改臣對曰凡詔敕之設本臣庶上陳之見寧一出先帝之口哉況聖人以便利萬物為至仁不以因循陳跡為孝且太宗皇帝改建隆之敕真宗皇帝革興國之法是皆不可乎此守株之談也

明道二年上時為
三司戶部判官

上哲宗乞修敕令

劉摯

臣竊以法者天下之大命也先王制法其意使人易避而難犯故至簡至直而足以盡天下之理後世制法惟恐有罪者之或失也故多張網目而民於是無所措其手足矣世輕世重惟聖人能變通之祖宗之初法令至約而行之可久其後大較不過十年一變法豈天下之大民物之衆事日益滋則法不可以不密歟臣竊以謂非事多而後法密也殆法繁而後姦生神宗皇帝遠因

革之妙謹重憲禁元豐中命有司編敕令凡舊載於敕者多移之於令蓋違敕之法重違令之罪輕此足以見神宗皇帝仁厚之德哀矜萬方欲寬斯人之所犯恩施甚大也而所司不能究宣主德推廣於其間乃增多條目離析舊制用一言之偏而立一法因一事之變而生一條其意煩苛其文晦隱不足以該萬物之理達天下之情行之幾時蓋已屢變今所謂續降者每半年一頒每次不減數帙矣夫法者天下之至公也造之而不能

通故行之而不能久其理然也又續降多不顯言其所
衝改故官司州縣承用從事參差抵牾本末不應非所
謂講若畫一通天下之志者也臣愚以謂宜有所加損
潤澤之去其繁密合其離異務在簡易明白使民有所
避而知所謂遷善遠罪之意伏望聖慈酌時之宜全法
之用選擇儒臣一二有經術明於治體練達民政者將
慶厯嘉祐以來舊勅與新勅參照去取畧行刪正以成

一代之典施行無窮

元祐元年上時
為御史中丞

上哲宗乞別修改奏讞不當免駁勘條

范百祿

臣竊以堯舜大典罪疑惟輕至周之時刑疑則從罰罰疑則從赦漢詔獄疑者讞有司不能決獄廷尉今敕所謂刑名疑慮者蓋本乎此書稱宥過無大周官以三刺三赦三宥之法求民情斷民中而施上服下服之罪原情定辟冀有以生之不得已焉然後刑殺令敕所謂情理可憫者亦出乎此祖宗立法以此為輕重賞罰之權

以此為人主好生之德但令有司審謹罪罰必當不妄貸凶暴當誅之人則為善矣故熙寧敕云如非疑慮可憫而輒奏者免駁勘此正合於漢詔所謂有合讞而後不當讞者不為失之意至元豐則已刪去上件與免駁勘之文中間雖曾申明然敕意終是未備至於去年十一月二十四日敕則云不得一槩將舊例貸配仍委三省點檢如有不當許用例破條奏乞取勘施行本部自承准著令已來每擬斷大辟固不敢一槩用例貸配然

官吏上下自非明恕不惑鮮不顧避點檢畏懼奏勘故
罪案條法雖在疑慮可憫之間稍不灼然明白則往往
入重不憚論殺以苟追一時之責兼不住看詳得其間
疑慮可憫者屢以批退故從依斷以此比之已前年分
大辟論殺分數為多仍訪聞比來在外諸州知有此約
東亦頗承望風旨不敢奏讞死刑臣愚以為上件著令
雖革得往時用例破條之弊不失有罪之人深恐行之
積年將見其間罪人必有當輕而重者不少矣甚違寧

失不經之義殆非朝廷好生之德謹具錄熙寧元豐敕
并去年十一月二十四日敕條及元豐六年以後并自
降去年敕條指揮後來十箇月斷貸過大辟分數繳連
進呈伏望聖慈特賜詳酌指揮下有司覆詳去年十一
月二十四日條貫參用熙寧元豐敕意重別刪修立法
庶使平國之刑協於中正天下幸甚

元祐二年上時
為刑部侍郎

上哲宗論省曹寺監法令繁密

蘇頌

臣聞在昔帝王之發號出令也必因時而施宜視俗而興化時朴野則濟之以文俗彫僞則示之以質隨變所適使民宜之故能久於其道而天下化成質文損益百世可知也國家刻五季之弊續有唐之緒累聖創制或革或因其道粲然於是大備仁宗皇帝以承平日久事多因循曠然有改作之志故開廣言路整緝治綱至於先皇帝遂大有為臺閣之務無所不舉然而事目寢廣法令益繁陛下臨御之初深知其故推原先志精加裁

損數年之間講明備至而法令之繁尚未盡革何以言之
先皇帝改定官制本欲憲章百王歸於簡要而奉行
之際羣臣不能究宣上旨各務便文事有未詳更復立
法積久不已遂致滋章故今日之弊良由闕防傷於太
密而畫一傷於太煩則難於通融蓋省臺寺監萬務所
萃置長立貳承之以僚屬所以裁處事務助成至治也
而官不任職每事立條事務日新欲以有司之文而盡
天下之務雖使臯陶制法蕭何造律勢不能遍況百司

所職條目不同而一司之間又有細務或通於彼而礙於此故有求之人不能悉曉遂至紛爭或經臺省投牒披訴文移往復虛煩取會其可行者無一二徒自奔競無益風教夫關防密則有司執文重疊問難小或違戾遂格而不行使有求者抑塞而不舒妄訴者牽制而不斷近者陛下特軫宸衷將革其弊故丁酉詔書分命近臣抽索文案看詳檢點內有拘文害事不近人情者許并元條刪改詔意如此可謂察見事情大慰羣望然而

行移彌月取索甚多定奪去取有礙他條不能盡如詔書之意誠由關防太密之所致耳拘礙如此亦可以謂之弊矣誠能少損其文致而濟之以忠厚則三代循環之政亦不過此臣愚欲望聖慈特詔近臣遍行取索應省曹寺監見用條制格式仍召集諸司官吏使之反覆詰問看詳定奪可刪者刪之可改者改之擇其要切者著為新令務從簡易使便於施用其餘令式所不能備者小事則從省曹長官專決大事則稟於朝廷簿書期

會悉付衆僚催督結絕若官司措置失當及徇私廢公致有赴訴並委臺察糾案如得實狀其當職官吏次第書罰有涉欺妄亦行懲責如此則臺閣規模有宏遠之致朝廷法度循簡易之規矣

元祐五年上時為翰林學士承旨

禁約

上真宗乞禁銷金

丁謂

臣准詔開封府民吳遂違制造蹙金服已決訖准別敕配隸令三司申明舊禁者竊以儉以制用有國之彝典

奢則不遜庶民之大防國家撫育黎元務厚風俗而輦
轂之下屢肆相望競造金箔用求厚利況山澤之寶所
得難致儻縱銷鎔實為虛費今約天下所用歲不下十
萬兩惜此上幣棄於下民雖王者居尊不貴難得之貨
而有司守職須條革弊之方自今金銀箔線貼金銷金
泥金間金蹙金線金裝貼什器土木玩用之物並請禁
斷非命婦不得用為首飾治工所用器悉送上官違者
所在捉搦許人糾告並以違制論告者給賞錢仍以犯

人家財充

大中祥符元年二月上時為三司使

上仁宗乞斷祆巫

夏竦

臣聞左道亂俗祆言惑衆在昔之法皆殺無赦蓋以奸臣逆節狂賊失規多假鬼神搖動耳目漢之張角晉之孫恩偶失防閑遂至屯聚國家宜有嚴制以肅多方竊以當州東引七閩南控百粵編氓右鬼舊俗尚巫在漢藥巴已嘗翦理爰從近歲傳習滋多假託禳祥愚弄黎庶勦絕性命規取貨財皆於所居塑畫魑魅陳列幡幟

鳴擊鼓角謂之神壇嬰襦襦祿已令寄育字曰壇留壇保之類及其稍長則傳習祿法驅為僮隸民之有病則門施符篆禁絕往還斥遠至親屏去使物家人營藥則曰神不許服病者欲食則云神不聽飧率令疫人死於饑渴洎至亡者服用又言餘祟所憑人不敢留規以自入若幸而獲免家人所資假神而言無求不可其間有孤子單族首面幼妻或絕戶以圖財或害夫而納婦浸淫既久習熟為常民被非辜了不為怪奉之愈謹信之

益深從其言甚於典章畏其威重於官吏竒神異像圖
繪歲增邪錄祆符傳寫日夥小則鷄豚致祀歛以還家
大則歌舞聚人餒其餘胙婚葬出處動必求師劫盜鬪
爭行須作水蠹耗衣食眩惑里閭設欲扇搖不難連結
在於憲典具有條章其如法未勝姦藥弗瘳疾宜頒峻
典以革祆風當州師巫一千九百餘戶臣已勒令改業
歸農及攻習鍼灸方脉所有首納到祆妄神像符錄神
衫神杖魂巾魂帽鍾角刀笏紗羅等一萬一千餘事已

令焚毀及納官訖伏乞朝廷嚴賜條約所冀屏除巨害

保宥羣生杜漸防萌少裨萬一

天聖元年上
時知洪州

上仁宗乞禁夜聚曉散及造儀仗事神

劉隨

臣聞好生惡殺往聖之大歆先德後刑前經之令範成
茲盛美允屬公朝臣近知侍御史李應言等制勘京東
李定祿等公事干連甚衆具獄聞奏兩宮聖慈特加欽
卹除首四人悉從寬典所謂好生之德洽於民心朝野

聞之無不相賀臣久歷外任粗知其由閭閻之中似此
多矣不食葷血迷謬相傳誘之以天堂怖之以地獄夜
聚曉散謂之修善無識之民多陷邪僻原其本情皆為
妄求佛果也目為不軌恐涉非辜愚迷者不知國法所
禁捕盜者但以發姦為公卒逢捕掩之期遂求奔竄之
路計窮拒捍或騁兇麤捶拷及身誑誤不少聖情軫念
昭雪至多足以見泣辜推人感召和氣也臣又伏見京
東羣民間有拜岳大會率歛財物千百為羣造作王者

儀仗及有真假兵器結束人物私自推補僭侈相尚搔率戶民原其本情皆為妄求福佑也若不嚴行禁制深慮別長姦兇或因捉搦送官恐將指為叛逆既有乘輿之物獄官何以申明若遂寘於深刑實慮成於枉濫各宜曉諭庶絕澆訛且夜聚曉散之徒為其虧損風教已有條制頭首及強梁者處死造乘輿兵器祀神者慮其兇黨竊發所宜特降明文臣欲乞似此違犯其頭首及強惡者並從違制本法科罪率從者勿治仍乞以此二

事散下諸道令鄉村要路粉壁書寫重新曉諭使民知
禁不陷刑章庶明善教之方用廣率人之化

天聖五年
上時為右

諫司

上仁宗乞逐去妖人張惠真 劉 隨

臣聞神怪之事天子不言妖妄之徒聖人切禁所以防
惑亂而止刑殺也臣竊知開封府有犯罪無目人張惠
真妄稱數百歲見在京師誑嚇聲俗若不早為逐去竊
慮別長妖訛牽掛平人漸紊刑法臣伏見天禧中西京

河陽妖怪大起不經旬日已到京師或云變化多般或云形狀怪異遞相驚恐街坊不寧遂出榜文定其爵賞許人告首庶獲妖人自後捉到夜聚曉散人張子元數百人命呂夷簡制勘決殺頭首六人其餘免死驚擾捕逐數月方安蓋因此徒造作幻術常加禁止尚恐妖興忽若信其妄言便恐別生怪異其張惠真採其羣議死必有餘本府蓋藏上惑聖聽免其誅戮獎信妖訛伏望聖慈不聽邪言速令逐去仍加防守勿縱妖狂庶茲巧

偽之徒不傷清淨之化

貼黃臣讀書見漢武帝好神仙方術之事封禪大
等為文成五利將軍館於宮中與之抗禮自後詐
偽俱發並皆誅死即知神仙之徒必不自言奇異
張惠真必是夜聚曉散妖妄之人伏望聖慈速令
逐於遠惡去處只如長眉行者之類亦不宜久在

京師惑亂衆庶

天聖五年上

上仁宗乞禁匿名文字

吳育

臣伏見近年以來多有造作讖忌之語疑似之文或不
顯姓名暗貼文字恣行毀謗以害讎嫌或密聞朝廷自
謂忠赤若是公直無隱何不指事明言若憑虛造作必
蘊邪謀更與隱秘姓名正使奸人得計臣恐自今忠良
立身易為傾陷國家舉事便欲動搖惑君害時無大於
此在古之法皆殺無赦雖然陛下聰明必不熒惑亦不
可使聖朝長此風俗

寶元二年上時為
右正言諫院供職

上仁宗乞禁戚里權要之家塗金

錢彥遠

臣伏見真宗皇帝詔書以塗金冗費上自宮掖下及庶民一皆禁止三十年間不敢有犯陛下奉以儉約遵守祖宗舊章雖申明塗金之敕歲下而近日戚里諸親權要族黨並以塗金衣服首飾相尚日增盛麗以至三朝慶會被服入宮蔑視刑典習為慣事且此巧偽之物蕩昏心目無益寒饑風俗所以趨競者禁雖立而法不行故好之愈甚況真宗皇帝崇本冲素講求制度欲為萬

世之戒豈可使之廢墜此乃國家守成大要屬在陛下
今欲乞嚴行禁約塗金匠人依舊條處斬如情理稍輕
刺面決配千里外牢城臣寮之家用使造作者並科違
制皇親戚里即不支俸錢一年其失於糾察賞罰並依
先朝之舊仍乞指揮內東門司使臣如有諸親命婦郡
縣主等入內輒服金衣首飾者並畫時禁止不令入內
一面具姓名申奏勘責如本非私情別因事彰露亦與
同罪所貴先朝之制遵行天下

皇祐元年上
時為右司諫

上仁宗乞禁止臣寮上封章告人之罪

呂誨

臣竊以著令臺諫官許風聞言事蓋欲廣其採納輔益聰明邇來中外臣寮密上封章告人之罪既非職分實亦侵官而又事多不根言無指實理非干已情緣報怨甚至詆訐平素之實暴揚曖昧之事朝廷既難明辨善人無以伸寬刻薄之徒寢成風矣況禮貴徙善法許自新日月既已經久赦降自當洗滌事儻涉於厚誣理固

宜於反坐臣伏乞今後非在言職輒以章奏指計他人
日前過犯及事非干已者即以所上文字付有司鞠勘
在外則置院推勘所貴止絕狂妄紊煩旒宸仍乞詔示
中外嚴行遵守

嘉祐六年上
時知諫院

上神宗乞立制度禁侈靡

吳大忠

臣伏見朝廷比修常平之法將以抑兼并振乏絕可使
民富而無離散失所之憂然行之累年雖蒙貸助之惠
猶粒米狼戾而無歲月之儲一有凶災散亡道路臣嘗

究其然矣時平日久文法闊疎小民不知謹身節用之道以惰為樂以侈相驕膳飲必精有一人而兼數人之食服御必華有一日而用數日之費况飲酒般樂游蕩無度畧無法禁安得不貧臣聞古者大夫無故不殺犬豕七十者始食雞豚狗彘之肉今則庶人日以宰羊豕為食不緣賓祭不為養老安得芻豢而共之古者庶人五十可以衣帛黼黻繡繪以章有德今則朱紫之飾不問府史美錦文綺逮於臧獲安得女工而供之至於宮

室輿馬器皿之奉率皆稱是而又釋老之徒齋薦塔廟
神祠巫祀鼓舞祈賽所費益以不貲故田野之民不安
其業滅裂鹵莽從事於農所獲既以不足則不免貸於
私家私貸不足又以貸於公府常平之息誠薄民貸於
公者誠願然一入其手侈費者十有六七若博奕飲酒
又不止此此殆法禁有所未具也臣愚伏願陛下深詔
有司申明法令畧立制度禁侈費以為用財之法民間
無職者皆書於籍任之以九職之事不能任則轉移執

事又不能則給以常餼以共公上之役如是則游手有
歸財不妄費富足之道足以馴致助成良法其防禁條
目已具別奏伏望詔下有司詳擇立法推行天下

元豐元年

時為河北
路轉運使

宋名臣奏議卷九十八

欽定四庫全書

宋名臣奏議卷九十九

宋 趙汝愚 編

刑賞門

恤刑

上真宗乞除非法之刑 錢 易

臣竊聞聖人之為政也太上以仁其次以智仁智不行
上下無信是以刑之設也蓋國家不得已而用之約禮

從輕察罪肆赦聖人實有憫傷之心焉是以刑之用期於無刑爾非欲毒於民也凡考罪之獄則五辭五聽無有疑屈然後擇其時而行之古者痛其不可盡行乃施許贖之典則君之省刑愛民斷可知矣堯之時誅四罪止曰殛鯀于羽山竄三苗放驩兜流共工於其處然此四罪者皆殺戮滅絕之典也蓋堯之仁聖而四者雖凶尚惡言殺是故國之重者莫先乎刑刑之傷者無至於殺乃修其法式以節其用刑不本於法則刑黷刑黷則

法無據法無據則國政暴國政暴則臣不敢言臣不敢言則一人專善惡之心以制天下燭理不及則幾於亂矣秦任商鞅仁智不行而厚於法天欲喪秦而始皇復酷於民棄三代之法恣一時之威行肉刑族誅之例為秦民者皆寃之殘害父母之體令受苦痛一人有過而九族遭誅漢祖既入關蕭何以文無害居宰相故約秦之法為三章文帝有德詔除肉刑此蓋秦漢是非明在簡策夫古之肉刑者劓椓黥劓之類然此刑者非死刑

也以其身命尚存今受其刑後代尚以為虐而絕之死
刑者有二焉大斬小絞絞者以首領猶全故分二等百
代奉之以為常法有司承式罔敢增變竊見近代以來
非法之刑不知建於何時本於何法律文不載無以證
之亦累代法吏不敢言而行之至於今日或行劫殺人白
日奪物背軍逃走與造惡逆者或時有非常之罪者不
從法司所斷皆支解鬻割斷截首足坐釘立釘鉤背烙
筋及諸雜受刑者身具白骨而口眼之具猶動四體分

落而呻痛之聲未息置之闌闌以示徒衆四方之外長吏殘暴更加增造取心活剝所不忍言十五年前杭州妖僧造變數歲前蜀部兩回作亂事敗之後多用此刑亦恐仁聖之朝不能除之則永為訛法今蓋以已死之刑復加鬻截斷割此即古五虐之刑不酷於今矣凡罪當死故重矣刑止於殺則絞斬行焉復使先受苦痛鬻截斷割然後就刑然亦非欲黷於刑所貴誠於後人令無犯者臣淳化中寄居壽春縣見巡檢使生釘一賊而於集

衆之際猶盜人物者此豈嚴刑可誠乎若使嚴刑可誠則秦之天下無一點首為盜賊矣漢文措刑亦亂國矣三代以來當先刑矣齊之以刑亦不當言民免而無恥矣臣愚見以謂一人愛民民亦愛一人既愛於上則奉上而懼苟以嚴刑欲誠則懼未至而怨已深伏惟陛下仁理天下德感中外事天地如父母愛赤子如嬰孺僭偽悉蕩祥瑞疊現古帝王不能行之者皆行之近代未復古者悉復之臣恐近代非法之刑非陛下能除之則

後代相承益為常行矣臣又竊見唐文皇以人之五藏
繫於背有罪者仍不行鞭背慮傷其命故於今稱善理
天下能保社稷皆曰文皇放死罪四百令歸畢農然後
就法至期而無一人不到者此豈在嚴也且近廣州僭
稱帝號理廣以酷死於毒刑湯煎鋸解靡所不至廣民
怨之立於刀刃今之史傳貶以尚刑太祖神德皇帝平
之而絕其法廣民於今歌頌鼓舞方保其生死亦無怨
今或非法之刑不除亦恐政闕況割心刖脛獨夫受行

之矣為萬古所笑今以此為刑臣恥之陛下亦必恥之
非臣盡心報政孰肯言於陛下非陛下大聖仁慈孰能
信臣而行之哉臣不勝深有所望乞自今後明下詔書
斷天下非法之刑止存絞斬則仁政王道盡在此矣陛
下從而行之則誅臣一身愚直之罪亦幸矣
咸平五年上
時通判蘄州
上仁宗乞天下死罪皆得一覆奏

燕肅

臣竊考唐大理卿胡演進月囚帳太宗曰其間有可矜

者豈宜一以律斷因詔凡大辟罪令尚書九卿讞之又
詔凡決死刑京師五覆奏諸州三覆奏自是全活甚衆
貞觀四年斷死罪二十九開元二十五年斷五十八今
天下生齒未加於唐而天聖二年斷大辟二十四百三
十六視唐幾至百倍京師大辟雖待覆奏而州郡之獄
有疑及情可憫者至上請而法守多所舉駁官吏率得
不應奏之罪故皆增飾事狀移情就法失朝廷欽恤之
意望准唐故事天下死罪皆得一覆奏議者必曰待報

淹延臣則以為漢律皆以季秋論囚又唐自立春至秋
分不決死刑未聞淹延以害漢唐之治也

天聖四年上
時判刑部下

其章中書王曾以謂天下皆一覆奏則必死之人徒充
滿狴犴而久不得決請獄疑若情可矜者聽上請遂下
詔曰朕念生齒之蕃抵冒者衆法有高下情有輕重而
有司巧避微文一切致之重辟豈稱朕好生之志哉其
令天下死罪情理可矜及刑名疑
慮者具案以聞有司無得舉駁

上仁宗論開封府公事不經糾察司引問

范鎮

臣等奏陳開封府勘到桑達公事不經本司引問便行

處斷雖攀援近例即元無正條乞今後一切編勅施行
令月十九日准密院劄子節文右開封府緣有上件體
例所乞今後一依編勅施行已奉聖旨不行臣等未曉
此理檢會開封府前後承受特旨勘鞫公事本非因聖
意有所喜怒皆是府縣失職不能禁姦姦發之後尚未舉
覺致煩聖聰旁加采聽正是其救過苟免之際然則結
案之後一行密問略辨白黑宜無所害何必深自蔽匿
偷欲了當或內懷不辜無所申吐恐此但可以成獄吏

舞文之敝而未足副朝廷恤刑之意也先帝聖德仁明
欽恤庶獄以京師浩穰刑獄最繁故建設糾察一司令
澄審真偽欲使凡受罪者自以不寃從建置以來每有
大辟倍加精密此則先帝不敢兼於庶獄庶慎惟有司
之任聖鑒卓然與文王等矣若以奉聖旨并中書密院
所勘公事即不錄問無乃非先帝之意亂有司之守大
凡設法者必關盛衰以立制防因循以杜漸今既曲許
聖旨中書密院所勘公事不復審察未見所以尊朝廷

重刑罰之理而適足啟府縣弛慢不勤其職獄吏侵侮
無所忌憚罪人銜冤不得告訴之弊此臣所不諭也又
竊見朝廷舊法中外通制官府常守皆不許用例破條
今或於四方承平之日京師取則之地刑獄極審之司
人命至重之際特許廢條用例事理乖舛又臣所不諭
也臣等蒙朝廷選委不敢不盡心誠望萬分有一可補
聖政非欲採撫錯失以為已能但先帝所謹者亦望陛
下謹之刑不可濫赦不可啟條不可廢苛不可廣乞今

後府司及左右軍巡大辟公事內雖係奉聖旨及中書
密院勘送者案成之後一依編敕施行貴得允當

嘉祐四年

七月同劉敞上時為知
制誥糾察在京刑獄

上神宗乞春夏不斷大辟

蘇頌

臣伏思國家以仁恩被冒天下祖宗重用刑辟陛下不
承謨烈憲章大備輕重得宜上自朝廷下及州縣遵守
條詔無有違者雖笞杖之責不合法令未嘗輒行其已
斷之獄猶加審察官司縱出者坐罰深故者或至廢斥

而不用臣嘗謂自堯舜以來經史所著用刑詳謹未有及我朝之仁恕平允者也惟論決重辟猶不以時而議者未嘗及之誠恐亦為聖世當行之一事臣愚戇不識大理故敢以前古之說言之傳曰賞以春夏刑以秋冬是以三代之時春夏未嘗行誅殺也史載秦世四時行刑王莽盛夏殺人皆是皆譏其虐政也漢制斷獄報重常盡三冬之月蓋不於陽盛之時勦絕生命所以協天意助人情也東漢以後或行或否近世遂廢而不舉其說

蓋患囚繫之淹久耳臣以謂獄官按鞠苟有連逮不以輕重追呼參驗動涉歲時未嘗以淹久故釋而不問也臣愚欲望聖慈參酌古義采用周漢詔天下獄囚自非惡逆以上決不待時外其餘衆罪並俟秋冬論決免當溫和之日而有愁痛之聲亦足以成聖朝仁恩之美也且無知之民輕犯刑網殺之為可矜貸之為廢法萬一待決踰時或遇恩降得從末減是陛下不廢法而全人命者多矣恩威並行民知畏愛上當天心感召和氣誠

太平之高致也

熙寧元年上
時知審刑院

上神宗論重辟數多

呂誨

臣聞先聖立法明刑者非以為治將以救衰亂之俗也
然世輕世重因時之弊齊其非齊殺以止殺故犯治則
重犯亂則輕斯馭威輔正之大要也降及三代稱治莫
盛於漢唐高帝約三章之始人心忻慰逮文景有刑措
之風比隆成康貞觀中斷死刑二十九人開元中五十
八人得為興隆之盛矣我朝興運一百餘年累聖繼述

仁德純被四方無事刑未至清天聖中歲計重辟數千而後有增無減漢唐之天下亦今之天下漢唐之官政亦今之官政斷獄繁簡何其遼哉臣竊以古之新一號令必示於人俾其知禁命一官守必先風教今之所理與古相反夫訓道不明則愚民陷焉人有過教未施而刑已加焉欲遷善遠罪而道亡繇也任刑之失正在於此加以賦歛日急力役日煩山澤之利籠入殆盡生齒之聚游手過半時豐儲歲食者百無一二不幸水旱相

繼流徙無定其等死則何所不至非不忌法勢使之然也矧閭井之人有不事事者悉皆循習以為常州縣熟視而不為除去姦吏養之以濟惡一有敗露抵法者皆良民平時誘脅之致職捕寇者罪爾朝廷推恩與時滌盪每歲曲赦三年大需蒙活者雖衆自新者無幾重辟安得有少衰也觀今之用文大率生刑入於重死刑出於輕犯笞杖者在民則或黥或配在官則衝替停任皆出特旨犯絞斬則遂成疑獄奏讞既上則例皆曲貸舞

文者附會其事出入死生在於掌握使幽冤無以訴刑之不清殆為此也廷尉天下取平之地今又欲以謀殺通守惠姦長惡莫斯之甚王符曰賊良民者莫大乎數赦孔明相蜀不赦而國治王通謂無赦之國其刑必平數子者皆知識幾深通乎世務豈無好生惡殺之意蓋知輔政之道本於無刑矣獨唐太宗用是而治嘗詔侍臣曰我有天下以來絕不放赦令四海安靜非常之恩也貞觀之刑不得不簡此其明效矣臣伏望陛下至明

燭理盛德圖新摠覽權綱欽恤刑典法網宜疎略使之
易避禁防宜高峻使之不越風俗大化屬於循吏號令
謹於反覆律文戒於搖動凡有赦恩無失有罪唯有註
誤與之原免仁慈如是而推廣則天下之訟必清重辟
之奏必簡太平之治不難成矣狂愚所慮仰副明詔唯
聖智詳擇海隅幸甚

熙寧二年上時
為御史中丞

上神宗論肉刑

呂公弼

臣伏見韓絳嘗奏乞用肉刑今日陛下亦以為然絳又

言假如折一支去一指有何不可況堯舜尚用之此徒信古之論不適時變自漢文感一婦人之言罷肉刑而天下歸仁逮今千餘年一旦暴行之駭四海觀聽況古雖有肉刑之法在堯舜之世亦未嘗行之書曰象以典刑流宥五刑堯舜之世用流以寬五刑也若四凶者止於流則五刑無所施焉臣願陛下上法堯舜下體漢文無取迂儒好古之論陛下病今之犯刑者衆臣願審擇守臣宣布惠愛使民各得其所則民不犯上矣今不究其

本而徒更其刑辟臣恐民心一駭而動後雖欲全撫之

未易安也

熙寧二年五月
上時為樞密使

上神宗論近歲刑獄枝蔓

文彥博

臣竊見近歲以來中外刑獄頗有枝蔓淹延大暑盛寒
縲繫囹圄其間豈無冤滯感傷和氣朝廷每至盛夏必
行踈決或水旱為災原減輕繫此聖慈欽恤之至也然
守臣獄官鮮能上副陛下之意有傷仁厚之化夫刑者
所以輔教聖人不得已而用之故三王任德不任刑以

德為陽居大夏生成之時以刑為陰居大冬不用之處
所施輕重昭然可知臣不敢以經史遠事言之竊以唐
之憲宗號為中興任德任刑頗得其理嘗謂宰相曰于
頓懷姦勸朕任刑欲朕失人心也且聖人感人心而天
下和平人主而失人心邦本何由寧固臣以謂今之牧
守監司宜得明惠厚重之人宣布朝廷寬大之澤施豈
弟之政變刻薄之風則太平之隆可垂拱而致

元豐三年九月

上時為太尉開府儀

同三司復判河南

上哲宗乞遵祖宗舊制降詔恤刑

范祖禹

臣近准中書省錄黃節文尚書省檢准元祐敕諸獄暑
月五日一次湯刷枷杻其罪人以時沐浴五月二十五
日奉聖旨令刑部遍下諸路開封府界今後每歲暑月
依上條施行者臣檢會祖宗舊制每歲冬夏降詔恤刑
自太宗皇帝雍熙三年以來累聖遵行未之有改至熙
寧二年編修中書條制所奏委逐路提點刑獄司每歲

於四月十月檢舉牒逐州長吏訖奏臣竊惟祖宗欽恤
庶獄特從朝廷降詔蓋當盛暑大冬之月使普天之下
至於海隅狴牢囹圄之中皆知聖主深居九重而憫念
及之此所以為仁恩也今令刑部遍下諸路雖重於提
刑司檢舉然州縣奉承宣布及書之史冊猶未若恤刑
之詔臣竊惜之欲乞依祖宗舊制令學士院每歲冬夏
降詔仍自今年十月為始以副陛下恤刑之意

元祐五
年六月

上時為
給事中

上哲宗乞用中典勿尚嚴刑為威

范祖禹

臣竊以先王欽恤庶獄務在於寬刑期無刑蓋非得已也國家一祖五宗以聖繼聖以仁繼仁哀矜於民率用中典此所以祈天永命垂百三十年太平之本也臣伏覩陛下聖性仁厚有堯舜成康之質比聞有司奏獄多務從寬臣願陛下長守此意操之勿失有勸陛下嚴刑峻法以威肅四方者宜拒而勿聽陛下為民父母海內

皆赤子也人君之勢其尊如天其不測如神誰敢不畏
何患威之不立而必嚴刑以肅之惟陛下聖意專主於
寬仁如天地之涵養萬物則刑罰庶可清省矣臣久侍
經幄無所裨補今將遠違左右思所以助陛下施陰德
益福祚結人心者莫先於此故不敢不言伏望陛下深
留聖心天下幸甚

紹聖元年四月上時出知陝州自宣
仁上仙熙豐餘黨復用盡變更元祐

政事欲以嚴刑峻法陷害忠良
祖禹逆知其意故臨去上此疏

議獄

上仁宗乞今後詳審庶事毋輕置詔獄

吳育

臣聞先王凝旒黻纁不欲聞見人之過失有犯典憲即屬之有司按文處斷情可矜者猶或特從寬典如此則恩歸主上而法在有司人被誅殛死亦無憾祖宗以來不許刑獄司狀外求罪是以人人自安近傳三司判官楊儀下獄自御史臺移勘都亭驛械縛過市萬目隨之咸共驚駭不測為何等大獄及文案具乃止坐請求常

事非有枉法贓賄又傳所斷罪名法不至此而出朝廷特旨恐非恩歸主上法在有司之意也且儀身預朝行職居館閣任事省府使有大罪雖加誅斬自有憲章苟不然者一旦至此使士大夫不勝其辱下民輕視其上非所以養廉恥示敦厚也自古刑獄滋彰之時誅家滅族冤枉大半大抵雷霆方震人莫敢言有司以深就深各圖自免或因而為利以希進取使君恩不得下達人情不得上通感傷至和災變百出陛下為四海愛戴之

主忽使道路之口紛紛竊議朝廷之士人人自危此臣
所以深為陛下痛惜之也若儀罪未斷臣不敢言今事
已往且無救解之嫌止祈聖神此後詳審庶事毋輕置
詔獄具案之上自非情涉巨蠹且從有司論讞不必法
外重行如此足以安人心靜風俗養廉恥召和平天下
之幸也

慶歷八年上
時知陝州

上仁宗乞發遣親事官吳清等照證公事

傅堯俞

臣近曾上言乞發遣親事官吳清等赴開封府照驗張文政公事至今未蒙施行臣竊思之深為不便豈有報人殺人不從對辨獄詞未盡冤抑可虞固非陛下仁惻恤刑之素意也臣伏料陛下非惜此數人但欲知外事恐沮塞之今後不敢報耳以臣所見實未為得若付之所司辯其是否而賞罰之則實事日聞於陛下惟慮言者多耳儻但縱之使言一切不問則以賂結之者有罪不發以事忤之者無過被報雖刺告盈前於陛下何益

適足以煩刑禁而搖善良之心況今吳清等事與前後不同本屬城南地分乃報城東公事事實當賞吳清等而罪城東探報之人事虛則吳清等豈得免責苟罔辯是非蕩無拘檢臣恐此曹過蒙優假因勢作威誣陷平民漸不可長必有謂若沮此曹則陛下無由知外事者以此誤陛下幸深思臣言則事理可見伏望早賜指揮發遣免致淹延刑禁且長小人之權臣不任懇激之至

嘉祐六年十月上時
為殿中侍御史裏行

上仁宗乞發遣親事官吳清等照證公事

司馬光

臣等伏以祖宗開基之始人心未安恐有大姦陰謀無狀所以躬自選擇左右親信之人使之周流民間密行伺察當是之時萬一有挾私誣枉者則鈇鉞隨之是以此屬皆知畏莫敢為非今海內承平已踰百年上下安固人無異望世變風移宜有釐革而因循舊貫更成大弊乃至帝室姻親諸司倉庫悉被此屬量其過失廣作

威福私受貨賂所愛則雖有大惡掩而不問所憎則舉
動言語皆被摭撫臣等嘗病國家擇天下英才以為公
卿大夫而猶不可信顧任此厮役小人以為耳目豈足
恃哉今乃妄執平民加之死罪使之幽繫囹圄橫罹楚
毒幸而不自誣服僅能辨明若更不聽有司詰問元初
巡察之人少加懲誠臣恐此屬無復畏憚愈加恣橫使
京師吏民無所措手足豈合祖宗意哉

嘉祐六年十二
月上時為諫院

上神宗論監司官所在多起刑獄

張方平

臣伏以國朝自祖宗以至陛下積德累仁重用刑辟急深故之罪寬縱出之罰愛育下民若保赤子致其忠愛可謂至矣近年監司之官所在多起刑獄至於州郡常程公事方行推問未見情實或已經檢斷事理明白於法平允偶其所見愛惡異同即別差官置司推覆事本微小張皇為大因緣擾株連枝蔓至有往還數千里勾追證佐盛暑嚴冬淹留牢禁其中有罪犯絕輕亦有

無罪之人一身以繫家為破散痠病飢寒愁痛無告及其結正亦有不移前案者推勘官承望其意巧文鍛鍊雖是平人亦須有虛妄為坐以一州一路為率至於天下銜冤抱枉感傷和氣災害日生且獄者人命所係王者所當深重者也豈容官吏依勢作威事既自外專行朝廷亦無由知得臣到陳州方此親見自三月末赴本任至四月中所司呈公事一件稱有兵士指論冒請糧米事係是去年十二月狀自後行遣會問回報始到遂

於四月十二日送司理院方行取勘文案未具當月十九日有轉運判官張次山到州點檢取索一宗狀詞將帶前去尋別差官置院推勘四月末所差官到院至九月初方始結絕歷一百二十餘日前後所經禁繫近六十人往還三千餘里勾追照證炎暑之月係累道路自夏涉秋其間病患相繼亦有軍員枉遭刑禁及至斷遣並止杖罪推院繳送到所取款狀二千一百三十一張淨案六百七十張諸雜行遣照證文字三十五卷當時若自

本州勘結不過十餘日可了其滋章為弊如此今又有
百姓樊宗望公事已經本州奏斷近轉運副使李南公
到州點檢取索上件公案將帶前去又已差官令置院
推勘臣詳樊宗望公事本州勘結頗已詳允具狀聞奏
法寺定斷尋已准朝旨斷放訖竊慮差官前來置院依
前追擾淹延貧細之民飢寒失所欲乞特下法寺取索
上件公案看詳委有情節不圓刑名差誤即乞別差官
依公取勘施行緣此置獄之弊事干天下伏乞朝廷特

降約束諸路非奉朝旨所置推院今推勘官候結案日具錄監司所送公事因由據到院出院月日但係勾追禁繫人數於在禁日有無病患死亡所追干繫人州縣程途近遠及斷放刑名開坐申中書送御史臺或法寺看詳事狀其有不當置院推鞠或淹延枝蔓枉繫無罪之人諸有非理伏乞議其多起刑獄巧文鍛鍊之罪則刑辟慎而和氣感召矣

熙寧五年五月
上時和陳州

上神宗論詔獄

彭汝礪

臣聞人主之所宰制羣動百官萬民如馭一馬進退遠近無不在我非獨威福之效也而有德禮焉上下之道報施而已上施之以禮則下欲報之以禮上施之以德則下欲報之以德其澤蓋非一世而已其遺波餘澤流溢漫衍及數十世而未已也朝廷數以疑似歲起詔獄卿士大夫標然懷苟免之心是故爭緣飾虛辭以為容悅故外有事君之禮而無事君之心造偽飾詐趨利亡恥其流及下浸不可止且古者於大臣其罪也甚章較

明白尚遷就而為之辭況事或出於嫌惡而多在於疑似此不可不重也故詩曰伐木椅矣析薪杔矣木非不可伐然必椅之恐傷其性也薪之欲析必固杔之不欲逆其理也彼於物如此而況於人乎彼於民如此而況於卿士大夫乎且夫人主之威非特雷霆也而勢非特萬鈞也大臣之生死貴賤在人主而已是至微賤今以雷霆之威萬鈞之勢震壓於至微賤之身而阻之以虎狼之吏罪之以秋毫之法又逼之以狴犴桎梏之具待

之如此何所求而不得者夫漢唐之臣入嬰冠冕退就圉
圉朝坐廟堂暮戮都市以今視之至有禮也自祖宗以
來愛養卿士大夫甚厚天下化之皆肅然有尊尊貴貴
之心今廷臣輕於陷法於是浸益陵夷矣臣聞之君子
言必慮其所終行必稽其所敝方陛下操與奪抑揚之
柄以御羣下必不為已甚然末流之敝恐有甚於漢唐
者夫舜咨四罪而天下咸服則刑罰雖盛世有不能無
也至於以愛惡而議獄以疑似而論罪實非天下之所

以望於陛下者

熙寧十年上時為
監察御史裏行

上哲宗乞罷大理獄

朱光庭

臣聞易曰聖人以順動則刑罰清而民服恭以陛下上契天心下符人意凡一舉動莫非順理刑罰之清萬民之服適當今日竊聞詔委御史中丞劉摯右諫議大夫孫覺看詳大理獄探報不當事有以見陛下寬仁之盛德其大理獄從而可廢伏緣治獄自有開封府御史臺安用更致此獄且獄名不一非治世之美事又帝居之側

豈當致獄之地凡為人臣者不務崇理義以輔太平而
乃長刑罰以虧仁德不忠莫大焉臣竊見刑部侍郎崔
台符戶部侍郎楊汲務為刻薄致位高顯久任大理官
稔為刑罰虧仁德之事乃不忠之臣也臣欲乞罷大理
獄并黜崔台符楊汲刻薄不忠之臣於外俾天下知聖
人唯尚仁德以化民則刑罰愈清而萬民咸服矣

元祐
元年

上時為
右正言

宋名臣奏議卷九十九

欽定四庫全書

宋名臣奏議卷一百

宋 趙汝愚 編

刑賞門

赦宥

上仁宗乞郊禋更不行赦 龐 籍

臣竊見南郊禮畢行赦且禮行於郊而勸賞賜赦者古之人無有也三王之世歲親祀昊天上帝於圜丘又祀

感生帝於泰壇漢朝有甘泉五時之祭綿代而降郊祀
不輟至於賞赦皆未之聞也有唐兵興以來事天之祀
歲或廢之迄於五代三年之行還必大賞所以勞衛兵
也必大赦所以蕩亂獄也然則所賞既大不可以歲舉
故必三載而躬祀也聖朝承五代之弊興千齡之統應
變以制事酌中而立治遠追前古之法近擇後王之迹是
以間歲報本就陽位而展禮一朝錫福御端闡而行赦
慶賞二柄行慶之道也謂夫法駕順動六師景從雖無

大勞而必隆賞所以勉軍伍而衛社稷也雖至愚以謂
賞者國家之大典可以仍舊謂夫狴牢悉啟桎梏並空
雖皆大罪而必盡赦所以滌衆故而使自新也雖至愚
以為赦者政教之大患不可常用何以明之且有罪者
宥之未必自新也被苦者抑之未必無怨也不能自新
將復為惡不能無怨將悔為善一赦而使民悔善復惡
故以為政教之大患也所謂常赦者除十惡鬪殺劫殺
謀殺並為已殺人者及放火官典犯正枉法贓至死不

赦外其餘罪咸赦除之設有鬪毆者折筋墮胎折跌人
支體及瞎其一目即損二事已上及因舊患令至篤疾
以威力取財雖不傷人是皆凶險之大楚毒之極寘之
常刑則可以舒平民之憤挫惡人之銳乃復被其大恩
出為無罪誠不足以增光盛德適足以塞和氣而已况
復將有事於南郊之歲必告布天下民以是知國將郊
裡郊必有罪乃先其時節用肆其凶暴雖約束之預降
終瑕釁之悉蕩宣父有言民可使由之不可使知之今

使之知所以為幸陛下誠能布發睿旨昭示天下今後郊裡之日除賞賜之外更不行赦使無敢為虐則善懦者懷惠凶頑者知禁

景祐元年二月
上時為侍御史

上仁宗論仍歲減降

蔡襄

臣伏覩比年以來盛夏之月陛下親慮京師繫囚令天下負罪者減降迭從輕典此蓋陛下嗟憫元元重罹禁網冒炎暑之苦而處狴牢之下天衷惻然下寬大之詔實羣生之幸也臣愚無智慮不能識天地無限之施而

竊有惑焉臣聞古先帝王躬慮獄囚皆以決冤滯非特
專宥過戾也迨隆冬緣亢旱則或行之非一定而不易
之制也向者國家行之比三年矣編戶之民習蹈前事
咸知指時月輕觸憲度豈非屢行之仍滋為弊夫法者
天下大公之本也故罪有小大法有輕重今所泣者大
罪而所處者輕法以非其罪邪雖輕法不得施安在降
其等乎誠當其罪邪重法尚不足以禁顧輕之何以革
小人之心而驅之嚮善哉國家每郊禮必大赦貸民之

罪固不鮮矣又仍歲有疏決減降之制臣謂貧弱者多
負冤而富強者多蒙宥為惠甚小而其蠹甚大非有補
於治體也伏望陛下參前古之制揀當今之敝罷減降
之詔而責天下州郡吏審辨獄情而勿久繫也臣疏賤
而言近不勝隕越之至

慶歷二年上時
為館閣校勘

上仁宗論不可數赦

范鎮

臣聞古人有言曰一歲再赦好人喑啞此言赦之惠奸
而無益於治道不可數者也屬者京師及畿輔歲一赦

而去歲再赦今歲三赦京師兵士又再得賜錢姑息之
政無此甚者夫歲一赦者細民謂之熱恩必其在五六
月間也猾胥姦盜倚為過惡指期以待免況再赦乎況
三赦乎其為惠姦虧損治道可知矣好人良善也數赦
尚猶喑啞蚩蚩愚民其不狃而為姦且盜者無幾矣又
今防秋備塞之人無慮五六十萬使聞京師端坐而受
賜能無動心乎不可不慮今陛下德音已下賜錢已出
臣知不可救已伏乞今後罷所謂歲一赦者以摧姦猾

而使善良有所立也罷兵士之特賜錢者以均內外以防後患而使民力得寬裕於財也昔唐太子承乾為長孫皇后病請賜赦以崇福佑長孫皇后曰赦者國之大事豈以吾故亂天下法乎長孫婦人耳猶能如此陛下聖人堯舜之資顧不為長孫后之所為乎臣竊惜之

至和

二年八月上
時知諫院

上仁宗論不可數赦

司馬光

臣竊以赦者害多而利少非國家之善政也虞書曰眚

災肆赦怙終賊刑謂過誤有害則赦之恃惡自終則殺之非不擇罪之有無併赦之也漢大司馬吳漢病篤光武親臨問所欲言對曰惟願陛下謹無赦而已王符亦曰今日賊良民之甚者莫大於數赦贖赦贖數則惡人昌而善人傷矣蜀人稱諸葛亮之賢亦曰軍旅屢興而赦不妄下然則古之明君賢臣未嘗以數赦為美也國家承順天心子愛百姓發號出令必先至仁然有數赦之弊猶未能去又古之赦者其出無常嚴謹周密不可

前知姦民猶抵冒以待之況今國家三年一郊未嘗無赦每歲盛夏皆有疏決猾吏貪縱大為姦利害民暴橫侵侮善良百千之中敗無一二幸而發露率皆亡匿不遇赦降則晏然自出復為平人徃徃指望謂之熱赦使愿慙之民憤邑惴恐凶狡之羣志滿氣揚豈為民父母勸善懲惡之意哉且疏決之名本以盛暑之際恐囹圄之中有滯積冤結有司不為申理使無所告愬故天子臨軒親加慮問平其枉直無辜則赦有罪則誅使久繫

之人一朝而決故能消釋沴氣迺致太和非謂不問是非一切赦之也又祖宗之盛時每歲不過一次疏決死罪以下皆遞降一等近年以來或至再三自徒以下一切赦之今歲五月以前疏決之令已再行矣此所以百職隳惰姦邪恣睢者也今縱未能盡革前弊伏望陛下特降指揮下中書今後每歲疏決不過一次或早或晚使外人不可預期其徒罪仍舊降從杖或遇親祀南郊之歲更不疏決永為定制庶幾為惡之人有所戒懼

嘉祐

六年八月上
時知諫院

上神宗論灾異不必肆赦

周表臣

臣伏見國家每因天文之異水旱之灾大則行德音於天下小則曲赦於四京臣竊惑焉夫數赦之為害古人論之詳矣蓋古者赦過宥罪行於過失遺忘而不以惠人陷於刑辟者非盜人貨財則脅弱暴寡者也使為盜者蒙釋則其主必憤疾使衆強者被宥則寡弱必無訴故赦者良民不被其澤而惡人昌矣又况小人習性之愚不能改過自

新其既出也大至於讎害其主小至於傷損平人則復穴
坯踰垣揭篋探囊故朝脫桎梏夕復殺人朝出囹圄夕復
為盜此非一日也國家何姑息於此而赦之乎昔成湯之
時其旱可謂久矣湯以六事自責而已未嘗聞赦也高宗
有飛雉之鳴可謂異矣祖己訓之以正厥事而已未嘗聞
赦也周宣王之時其旱亦可謂久矣詩美其側身修行而
已未嘗聞赦也夫遇災應變得如成湯高宗宣王不亦可
乎而必赦姦宄以為惠不亦異乎竊原國家之意豈非謂

刑罰獄訟或有寬濫故赦之以致和氣苟得其人則自無
寬濫矣況近年以來省法弛禁人持近厚之心刑罰清而
獄訟理乃使克奸之人概蒙釋宥恐非國之福也臣願朝
廷或遇災異求古明王所以應天之道或修法度政事之
未備者或求惠民濟衆之未至者或舉擢有道德才行而
隱晦於下位者或出官嬪之間執事歲深與無職掌掃洒
而幽閑者臣聞太祖皇帝躬履儉約嬪御不滿三百猶以
為多嘗因霖雨又出數十人此近事之驗也凡此皆先王

舊典或祖宗故事惟陛下博求行之以應變而赦不妄
下庶使乎寇賊奸宄無不息矣

熙寧元年上
時通判利州

錫賚

上仁宗論無功不當賜第

蘓舜欽

臣昨於十月二十三日內侍省牒奉聖旨下務支借小
宅一所與司天監楊可久今月十八日准三司帖傳聖
旨指射舍屋三十間以來與醫官副使柳堯卿居止者竊
以賜第之典於國體至重前朝將相非有勲業則不得

賜第京師近劉平血戰亡軀家族無託朝廷方推此惠
時謂當然今茲醫卜庸流濫有求請煩瀆天聽侵亂邦
經况賞罰二端國之神器所以驅駕豪傑示信四方若
死行陣之家與伎術之輩均用此賞臣竊恐輕重失宜
矣方今西鄙未寧暴師塞外流傳四出何以勸人伏望
特降德音即時寢罷况柳堯卿自有居第極為華侈若
以其醫藥有效自可以金帛賜之上以重恩賞之科使
戰伐者盡其死力下以絕僥覲之望俾貪冒者萌其恥

心臣事在職司合有獻納蓋期賞之不僭非敢文而自營上瀆宸嚴無任懇禱之至

康定元年十一月上時監在京樓店務

上神宗辭賜金

司馬光

臣前日蒙賜金五十兩并銀合臣以所賜過厚尋問永昭陵禮儀使范鎮知舊例所無不敢當受遂具奏陳乞許令回納伏蒙聖慈特降中使宣諭令受臣上荷恩遇至深至重螻蟻微命不足為報愧懼流汗無所容措然臣竊聞昔韓昭侯有敝袴命藏之侍者曰君亦不仁也

不以賜左右而藏之昭侯曰吾聞明主愛一嘖一笑嘖
有為嘖笑有為笑今袴豈特嘖笑哉吾必待有功者彼
一敝袴猶不以與無功之人況數十兩之金乎魏太祖
之為政有功宜賞不吝千金無功妄施分毫不與我太
祖太宗之御臣下亦然故能驅駕英豪光啟大業夫明
主之不妄賞賜非吝之也誠以賜一無功則天下無功
之人皆有徼覲之心有功之人皆懷怨望故也借使一
人有功而人主賜之金無功者不得其有功者必喜何

則衆人不得而我獨得之是人主知我之功者其榮多矣如是則智者獻其謀勇者竭其力雖使之赴湯火猶將甘而樂之若有功者賜千金無功者亦賜千金其有功者必不悅何則彼無功而我與之均是人主待我無以異於彼也其辱深矣如是則有功者皆懷怨望誰肯竭其智力觸冒死亡以徇國家之急哉故官爵金帛者人主所以鼓舞羣情使之奔走左右而不知者也然則明主愛一嘖一笑豈為過論哉仁宗皇帝天性寬仁承

宗廟餘烈府庫充實身雖節儉而好施人羣臣左右貪求恩惠賜予之例因茲寔廣府庫之積日益減耗不幸又於五年之中再遭大喪左藏內藏奉宸等庫率皆空竭當此之時舊例所有猶宜鑄減以救其弊況可以例外橫賜無功之人乎昔陛下以國用不足之故永厚陵猶遵遺制比永昭陟事裁減而賞賜羣臣之物乃更多於永昭陵之時臣雖小人無知亦安能循此理而自安乎此所以夙夜憂惶無以自處者也況府庫之物廼天

下萬民之物也自非有功於民者皆不宜得之臣所以仰違詔命堅辭賜物至於再三者非自飾小廉也廼欲助陛下成治道也伏望聖慈察其誠懇依臣前奏許令

將所賜金并銀合回納入庫

治平四年六月光奉勅充英宗山陵儀仗使上時降

中使賜箔金五十兩並銀合重三十兩光上奏辭之不許故再上此奏時為御史中丞

上神宗乞權罷南郊臣寮賜予

錢顗

臣伏以邊境未寧軍需至急朝廷經費百倍於祖宗之

時帑藏空虛間或兼水旱之患從今不務省減向去何
以枝梧然而事有權宜理難固執豈可目前只圖僥倖
之利不能力為陛下久遠之謀臣雖至愚言思有補臣
謂今冬郊祀之禮陛下在亮陰恭默之中遵先朝三年
之舊制是亦不得已而行之內外供費豈當用平時之
例而況覃霈之恩未遠特支之賞亦頻天下之財取之
盡毫末數年之內用之無孑遺民力既極困窮國用正
宜裁損臣聞在真宗全盛之世尚詔三司減郊祀應奉

之物十餘萬載於國史足以為法陛下誠思咸平中府庫之所積孰與今日為比耶所有將來南郊伏乞陛下特降睿旨除三軍賞給外應内外文武臣寮舊例賜予一切權且寢罷至於應奉不急之費亦乞減削如此則內足以省國用外足以寬民力豈曰小補之哉唯陛下斷在宸衷而力行之天下不勝幸甚

熙寧元年上
時為殿中侍

史御

上神宗乞聽宰臣辭免郊賜 司馬光

臣伏覩宰臣曾公亮等奏以河朔菑沴調用繁冗欲望將來大禮畢兩府臣寮更不賜銀絹奉聖旨送學士院取旨議者或以為兩府所賜無多納之不足以富國而於待遇大臣之禮太薄頗為傷體臣愚竊以為不然古者冢宰制國用視年之豐耗量入以為出固不可於饑饉之時守豐登之法也是故歲凶年穀不登君膳不祭肺大夫不食梁士飲食不樂明君臣上下皆當深自貶損以救民急也臣竊惟國家帑藏素已空虛重以今歲河

北之地災害特甚鄉者慶歷之末河決商胡民田雖傷
官倉無損而河北父子相食餓殍蔽野今河決之外加
以地震官府民居蕩為糞壤繼以霖雨倉粟腐朽軍食且
乏何暇及民冬春之交民必大困甚於慶歷之時國家
豈坐而視之不加賑救乎况復城櫓須修河防應塞百
役並興所費不貲當此之時朝廷上下安得不同心協
力痛加裁損以徇一方之急凡宣布惠澤則宜以在下
為先樽節用度則宜以在上為始今欲裁損諸費不先

於貴者近者則疎遠之人安肯甘心而無怨乎必若為
臣有大勲於天下雖錫之山川土田附庸何為不可若
止因郊禮陪位而受數百萬之賞臣竊有所不安矣臣
前所謂賞賜不節者此亦其一也雖臣下不辭猶應裁
減況其自辭減又何損乎倘若但務因循姑息度日欲
裁損乘輿供奉之物則曰減於制度大為削弱非所以
華國欲裁損大臣無功之賞則曰所減無多虧傷大體
非所以養賢欲裁損羣下浮冗之費則曰人情不悅恐

致生事非所以安衆如此則國用永無可省之日下民永無蘇息之期必至於涸竭窮極然後已也且君子之所尚者義也小人之所徇者利也為國者當以義褒君子以利悅小人今大臣以災害之故辭錫賚以佐百姓之急義之可褒者也陛下從而聽之乃所以為厚非所以為薄也雖然兩府銀絹止於二萬匹兩不足以救今日之災又國家舊制每遇郊禋大賚四海下逮行伍無不霑洽不可於公卿大夫全無賜予臣愚以為文臣自

兩省以上武臣及宗室自正任刺史以上內臣自押班
以上將來大禮畢所賜並宜減半俟他年豐稔自依舊
制其文武朝臣以下一切更不減似為酌中臣亦知此
物未能富國誠冀國家因此漸思減損其餘浮費自今
日為始耳臣素愚戇識慮庸淺所言者皆目前之實狀
非竒偉之高論也伏望陛下更賜裁察若果有可取乞
斷自聖志勿為衆言所移實天下幸甚

熙寧元年八月
上時為翰林學

士後數日光與王珪王安石同進呈郊賚劄子於延和
殿光言方今國用不足災富荐臻節省冗費當自貴近

為始宜聽兩府辭賞為便安石曰國家富有四海大臣郊賚所費無幾而惜不之與未足富國徒傷大體昔常袞辭賜饌時議以為袞自知不能當辭祿今兩府辭郊賚正與此同耳且國用不足非今之急務也光曰袞辭祿猶知廉恥與夫固位且貪祿者不猶愈乎國家自真廟之末用度不足近歲尤甚何得言非急務耶安石曰太祖時趙普等為相賞賚或以萬數今郊賚匹兩不過三千豈足為多光曰普等運籌帷幄平定諸國賞以萬數不亦宜乎今兩府助祭不過奏中嚴外辦沃盥奉帨巾有何功勤而得比普等乎與安石爭論久之王珪曰司馬光言省費自貴近始光言是也王安石言所費不多恐傷國體安石言亦是也惟陛下裁之上曰朕意亦與司馬光同今且以不允答之可也是日適會安石當制遂以已意批答公亮等因不復辭

上哲宗論賜楊琰度牒

蔡 蹈

臣伏觀近降聖旨指揮以金明池修龍舟了畢特支度牒十五道賜供備庫副使楊琰者按琰本木工止緣技巧馴致使名祿養豐厚特有加賜近代以來以工巧被寵遇者未有如琰比也而琰之圖效非有塞旗斬將之勞而操規矩執繩墨以指揮庶工正其責也龍舟之役其費不貲朝廷不責其過侈以傷太府之財幸也復以度牒賜之未為允當且今度牒直金二百千以十有五牒計之凡三千緡非不多矣舉而授琰曾不計校甚亡謂

也若謂其功可賞耶設或運機精思殫盡奇巧以窮耳目之玩不過百工何足多尚朝廷賞之過厚內外籍籍不無議論凡賞罰所以存勸沮也賞當乎功則天下勸而赴功者有之矣罰當乎罪則天下沮而遠罪者有之矣今以一龍舟之勞而命賞過厚不知意果何在耶若謂其勞不可以不賞則邊陲用命國爾忘家之人緩急不同假令邊陲之士為陛下臨危拒敵而致其死不知何以為賜予臣等竊聞諸路州郡每有興修河渠水利

官府祠廟等於朝廷乞降度牒不唯重惜未即應副而詰問勘當十不得五其重如此而獨於賞琰不以為意何耶臣等愚陋欲望聖慈特賜裁減天下幸甚

紹聖三年上時

為監察御史

上徽宗乞今後非有大勲業者不賜第

翁彥國


臣伏以慶賞之柄人主所以礪世磨鈍也仰惟陛下勵精致治未明求衣肝食聽事以詔多士士之起以赴功

底績者不可勝計於是醴於用賞以示勸焉甚盛之舉也然禮有常數事有藝極過則為濫臣請撫所聞而論之伏見比年以來臣寮有被眷異者不惟官職之超躡錫賚之駢蕃多遂賜第者臣聞蒙賜之家則必宛轉計會踏逐官屋以空閑為名或請酬價允買百姓物業實皆起遣居民大者亘坊巷小者不下拆數十家一時驅迫扶老攜幼暴露怨咨殊非盛世所宜有況太平歲久京師戶口日滋棟宇密接略無容隙縱得價錢何處買

地瓦木毀撤盡為棄物縱所得地何力可造所失者固已多矣旣而鳩工市材一出公上請托營繕務極壯麗糜費不貲陛下知其為恩未知其為害羣臣莫為陛下言者得無惡於害已歟設將相大臣有大勲大業非尋常賞典所可報賜第可也邇者用為從官一無可紀已聞賜第矣恩倖技術憑藉寵遇攀援僥求漸不可長陛下以天下為度於臣寮慶賞略不小靳此天下所共惜之臣願為之甄極而已臣寮所得月俸以其終身計之

幾何哉至於賞格最厚者不過數百匹兩使歲月之中
比比受賜亦幾何哉奈何頻笑之頃頻損十百萬為一第
之費及斂數十百家之怨為一家之惠陛下何取於此
天下之財入之有經用之有節將積如丘山公私富藏
可改而待也入之有經用之無藝江河之流不能實漏
卮矣伏望睿慈少賜留神萬一可採請自今以始非有
大勲大業暴著天下者弗復賜第雖已得旨許三省執
奏臺論諫爭庶以下息覬覦之心仰稱聖明愛民節用

之意
大觀三年七月上
時為御史中丞



宋名臣奏議卷一百